



# Synfocity = 561

mail us at : [mzsynfo@gmail.com](mailto:mzsynfo@gmail.com); [mizoramsynod@gmail.com](mailto:mizoramsynod@gmail.com) - Phone - 2314648

5<sup>th</sup> November, 2015

## □ Synod-in chhawmdawlina pe

Tun hnaia harsatna hrang hrang neite hnenah Synod Relief Fund atangin chhawmdawlina hetiang hian pek an ni.

S.No	Khua	Pek chhan	Chhungkaw zat	Chhawmdawlina pek zat
1.	Hunthar Veng	Rethei	6	Rs. 48,000/-
2.	Model Veng, Aizawl	Rethei	2	Rs. 16,000/-
3.	Tuikual South	Damlo/Rethei	1	Rs. 8,000/-
4.	New Khojoysury	Damlo/Rethei	1	Rs. 8,000/-
5.	Tawizo Kohhran	Biak In Ceiling chhia Siamna tur		Rs. 1,00,000/-
6.	Leithum	In kang	1	Rs. 10,000/-
7.	Hualngohmun	Bus Accident-a thi	1	Rs. 8,000/-
<b>TOTAL</b>				<b>Rs. 1,98,000/-</b>

## □ Rb.H Kirloskar Hruaina Eng Quiz

Zanin (Nov. 5, 2015) dar 7:00 hian Rb.H Kirloskar Hruaina Eng Quiz chu Zosaphluia Hall, Mission Veng-ah tan a ni dawn ta.

Quiz tan hma hian hawna hun hman a ni ang a, Rev. R.S Rokima, Synfo Committee Member-in hunserh a hman ang a, Rev. Lalramliana Pachuau-in quiz hawna neiin Pathian hnenah a hlan ang. Host NI Lalbiakremi Fanai-in inhmelhriattirna a nei nghal ang.

Zanin hian a hmasa zawkah Hmunthar Kulikawn, Khatla East, Tlangnuam South, Ramhlun North, Zemabawk Vengthar Kohhran ten inelna an nei ang a. A hnuhnung zawkah Hunthar, Luangmual, Chanmari West, Electric Veng (Kolasib), Dawrpui Kohhran ten inelna an nei leh ang. First Round hi November 6, 10, 12, leh 13 zanah te chhonzawm leh tur a ni a, Second Round hi November 20 -ah Top ten chin ten inelna neih leh a ni ang a, Nov, 27 -ah Final neih tura ruahman a ni.

Rb.H Kirloskar Hruaina Eng Quiz hi Synod Information & Publicity Department (Synfo) in Rampum huap Kohhran Pavalai Pawl te tan a buatsaih a ni a, Quiz ti tha lawmman ah hian Pakhatnain Rs. 80,000/- Pahninhain Rs. 50,000/- Pathumnain Rs. 30,000/- an dawng ang.

He quiz atan hian sponsorship zawn niin main sponsor atan Rb.H Kirloskar, Millenium Centre hman an ni a, co-sponsor atan Highland Chevrolet, Zemabawk an ni. Rb.H Kirloskar Hruaina Eng Quiz hi show neih apiangin zan dar 7:30-ah **Hruaina Eng Channel-ah Live** in pekchhuak thin a ni ang.

## □ Zin

◆ October 30 - November 6, 2015 chung khan School of Discipleship, Cambodia-ah Graduation Day hmangin Rev. Lalchhuanmawia, Secretary, Synod Mission Board leh Rev. C. Lalsangliana te an kal.

◆ November 5 & 6, 2015 chung hian Shillong-ah Income Tax buaipui turin Tv. Zaihmingthanga, Accountant, Synod Office a kal ang.

◆ November 7 & 8, 2015 chung hian Sialsir Kohhranah Literature Seminar neih a ni dawn a, hemi hun hmanpui tur hian Rev. K. Lalpiangthara, Editor, SL&PB leh Upa C. Lalbiakluanga, business Manager te an kal ang.

## □ Mission Board

◆ October 29 - Nov. 1, 2015 chung khan Arunachal and Assam Mission Field East te chuan Miao -ah Gospel Festival hlawhtling takin an nei a. Gospel Festival-ah hian Speaker chu Rev. Vanlalbela a ni a, Live Band te leh Solo pawh inkhawm apiangin ngaihthlak thin a ni bawk. Speaker thuchah ropui tak tak leh zaia rawngbawlina te Pathianin mal a sawm a inkhawm pawh an thahnemin zantin inkhawm mi 1000 vel lai an tling thin a ni. Hetiang Festival lian tham hi Miao khuaa buatsaih hmasak ber tum a ni a, Kohhran pawl hrang hrang leh public leaders ho te pawhin an hlutin an tawiawm tha hle.

◆ October 30 - Nov. 1, 2015 chung khan Jharkhan Mission Field te chuan Convention an nei a. Speaker atan Pu C. Malsawma hman niin thupui chu "Damna Famkim" tih a ni. He Convention-ah hian tihdam rawngbawlina neih niin Pathianin mal a sawm hle a, naupang tawng theilo te an damin ke-na an zawn luh te pawh kein an haw thei hial a ni. Synod Mission Choir te leh Aizawl Venglai Kohhran hoten an hmanpui bawk. Baptisma chang thar mi 42 lai an awm a ni.

◆ October 30 - Nov. 1, 2015 chung khan Assam Mission Field chuan Guwahati ah beihpui an thlak a. An thupui chu 'Hmangaihna thuchah' niin Speaker atan a ram mi Pu Ghana Handique hman a ni. He Beihpui hi Nehru Park ah Open Air a hun hman thin a ni. Assamese zaithiam lar Mahendra Hazarika rawih a ni a, amah hi kristian ni lo mahse thawktuten Pathian fakna hla an zirtir a sa thin a. Pi Nancy Zothanmawii leh Kolasib Masihi Sangati zaipawl ten Pathian fakna hla mawi takin an sa thin bawk.

◆ October 30 - Nov. 1 chung khan Upa Denghmingthanga, Kulikawn leh a thiante chuan mahni-a senso intumin Khagaria Pastor Bial-a Khagaria Fellowship-ah Crusade hlawhtling takin an nei a, ringthar baptisma chang 2 an awm.

## □ KTP

◆ November 3, 2015 (Thawhlethni) chawhma dar 10:30 khan KTP General Conference pandal sakna tur New Champhai Field chu 56th KTP General Conference Organising Committee Chairman Rev. Lalparchhuana'n Pathian hnenah a hlan a. Pandal hmun hlanna leh hnatlang tannaah hian Organising Committee, Sub Committee hrang hrang leh Branch 25 Office Bearers te an tel a. Sub-Committee hrang hrangte hian an mahni chanpual theuh hnatlangin an bei tan nghal a ni.

◆ November 5, 2015 (Ningani) hian Kanghmun Branch KTP Diamond Jubilee lawmna neih a ni a, hemi hmanpui hian Rev J. Lalremsiama, Central KTP Leader a kal.

◆ November 6, 2015 (Zirtawpni) khian Baktawng Venghlun Branch KTP Diamond Jubilee lawmna neih tur hmanpui turin Upa Richard Lalhriatpua leh Pu Zonunsanga Ralte (Comt members) te an kal ang.

◆ November 7, 2015 (Inrinni) zan khian Dawrpui Branch KTP Diamond Jubilee lawmnaah Pu Samuel Laldingliana'n, Hruaitu hlui pual Programme-ah thu a sawi ang a. A tuk Pathianni (Nov. 8) zan inkhawmah Upa Zonunmawia, General Secretary-in thu chah a sawi bawk ang.

Contd..

- ◆ November 7 - 8, 2015 chung khian Champhai Joint KTP Meet, Ruantlangah neih tur a ni a, hemi hun hmanpui tur hian Rev. J. Lalremsiamia, Central KTP Leader leh Pu C. Laldingliana te an kal ang.
- **Kohhran Hmeichhia**
  - ◆ November 6 - 8, 2015 chung hian Sesawng Kohhranah Leadership Training leh Kristian Chhungkaw Campaign neih a ni dawn a, hemi hun hmanpui tur hian Pi Lalfeli, Pi Denghmingliani leh Pi Lalduthangi Comt member te an kal ang.
  - ◆ November 6 - 8, 2015 chung hian Hliappui Kohhranah Leadership Training leh Kristian Chhungkaw Campaign neih a ni dawn a, hemi hun hmanpui tur hian Pi C. Nuzawni, Pi Zopari leh Pi Sawithangi Comt. Member te an kal ang.
- **Synod Bookroom**

Kum 2016-a Nilai leh Beihruah thupui zir tur - 'Mihring leh a nihna'; tih Rev. Dr. Lalchungnunga ziah chu peih fel a ni ta a, Synod Bookroom Branch tinah lei theih a ni.

Kum 2016 atana Nilai leh Beihruah Thupui bu hi copies 65000 zet chhut a niin Nilai leh Beihruah Thupui buatsaih tawh zingah chhut tam ber tum a la ni a. Puitling Sunday School zir laibu dawtah lehkhaw mala copies chhut tam ber a ni bawk.

Tun tum Thupui bu hi pheh 298 zeta chhah a ni a. Mimal lehkhaw chu ni se Rs. 150 man tur vela ngaih a ni. mahse Synod-in a chhut man a tum avangin Synod Bookroom chuan Rs. 90 chauhvinn a hralh thei dawn a ni.
- **Hruaina Eng FM Radio & TV Programme**
  - ◆ **NOVEMBER 6, 2015 (FM ZOAWI AIZAWL @ 7:30 P.M.):**  
**P.C. Girls School Night**
  - ◆ **NOVEMBER 6, 2015 (FM LUNGLEI @ 7:30 P.M.):**  
**P.C. Girls School Night**
  - ◆ **NOVEMBER 8, 2015 (Tv Programme) @ 3:00 p.m) :**  
**Weekly Round Up, Masihi Sangati Convention 2015 (Fellowship)**
- **Susamachar Prasaran Programme**
  - ◆ **NOVEMBER 8, 2015 (Pathianni) 5:00 pm.:**  
**Group/Choir/Solo :** Central PYF Choir - Krus Par, **Group/Choir/Solo :** Champhai Vengthlang Pastor Bial - Hamara Kal, **Sermon :** Rev. David Lalramliana Ralte, **Group/Choir/Solo :** Chhinga Veng Masihi Sangati - Isu Bula Raha Hai, **Group/Choir/Solo :** Zemabawk Bial Masihi Sangati - Jiboner Last
- **Moderator Programme**

Synod Moderator Rev. Lalrinmawia chuan tunkar tawpah hetiang hian hun a hmang ang :

  - ◆ November 7, 2015 (Inrinni) Zan - Sialhawk South Kohhran, Sialhawk Bial
  - ◆ November 8, 2015 (Pathianni) Chawhma - Tlangpui Kohhran, Sialhawk Bia
  - ◆ November 8, 2015 (Pathianni) Chawhnu - Tlangmawi Kohhran, Sialhawk Bial
  - ◆ November 8, 2015 (Pathianni) Zan - Sialhawk Kohhran, Sialhawk Bial

### ADVERTISEMENT

Synod Office Canteen I & II Mission Veng a mi luaktu tur mamawh a ni a, dilna ni 27.11.2015 (Zirtawpni) tlai dar 3 thleng Synod Office Property-ah thehluh theih a ni ang. Interview ni 30.11.2015 (Thawhtanni) zing dar 7-ah Synod Office Committee Room No.-I ah neih tur a ni a, diltu chuan Menu felfai tak dilna-ah thehluh tel tur a ni.

**Rev. Lalramliana Pachuau**  
Executive Secretary  
Synod Office, Aizawl

### ADVERTISEMENT

Synod Mission Board(Mizoram Presbyterian Church) chuan kum 2016 chung Contract basis-a thawk turin Missionary a la dawn a, dil duh tan dil theih a ni.

Dil duh chuan a hnuai a tarlante hi hriattur a ni:

1. Synod Mission Board Office, Mission Veng, Aizawl atangin dilna form siam sa(standard application form) lak tur a ni a, hriattur tulte chu dilna form-ah tarlan a ni.
2. Dilna chu November 18, 2015 (Nilaini) tlai dar 4 thlengin Synod Mission Board Office-ah thehluh tur a ni a; hun tiam hnu lama dilna thehluh chu pawm a ni lo vang.
3. November 21, 2015 (Inrinni) chawhma dar 11-ah PC Girls School, Mission Vengah Written Test neih tur a ni a. November 24, 2015 (Thawhlehi) zing dar 7-ah Synod Office-ah personal interview neih tur a ni.
4. Written test topic tur chu hetiang hi a ni ang:
 

a) Bible Knowledge (Chanchin Tha bu 4 leh Tirkohte thiltih)	- 50 marks
b) Mizoram Presbyterian Kohhran Chanchin	- 40 marks
c) General Knowledge	- 10 marks
5. Hlawh chu Synod hnuai a Contract Basis-a thawkte rawihna rate angin pek a ni ang.
6. Hrechiang duh chuan phone no. 3089-2325899-ah Office hun chungin zawhfiah theih a ni.

**Secretary**  
**Synod Mission Board, Synod Office**

### HRIATTIRNA

Synod buatsaih Gospel Camping chu November 13 - 18, 2015 chungin Synod Revival Camping Centre-ah neih leh tur a ni a, speaker atan Upa R. Lalhmachhuana, Mi Lungngaithe thian Team a ni ang. Camp lut duh te chu mahni Kohhran Secretary hnenah in report tur a ni. Registration Fee Rs. 100/- ken tur a ni.

**Director**  
**Synod Revival**